

Waor of niet waor?

Dick van Bloemendaal

Hele kleine verhaoltsjes die soms warkeluk gebeur bin en verhaoltsjes die ik uut m'n duum 'ezeugen het. Veur julie een vraag, mar veur mien een weet, welke wel of niet waor bin.

Moffenmeiden

In de leste oorlog waren dur ok in ons darp deres die mit de Duitse soldaoten scharrelden, moffenmeiden werden ze 'enoemd. Dat leek de Puttense jonges helemaol niet, die han aordig de pest an die deres, mar kossen dur weinig an doen want die moffenmeiden ver-raoiden de jonges gewoon an die Duitsers as ze 'epest werden.

Naodat Putten op 18 april 1945 deur de Canadezen was bevried en de Duitse soldaoten vort waren, was de lol vur die moffenmeiden dur aordig of. Mar toen leien ze ut an mit de Canadezen en kossen ze weer volop an de vriërie mit disse soldaoten. In de bossen rechts van de Prins Hendrikweg, bie de Nepveu- Emma – en Julianalaon was een soldaotenkamp van de Canadezen en daar lagen die zelfde deres weer te vallen mit de Canadezen. As kleine jonges liepen wulie dur ok altijd te schooien um sukelaos en sigretten en daar het ik mien eerste sigret 'eroekt en werd ik zo misseluk as un kat, alles wat ik in mun lief had hek dur uut 'ekotst, mar toch bin'k stug deur blieden roken umdat ut zo stoer stung.

De ouwere jonges en een paor getrouwde keerls, onder andere Ger-rit Snor, gingen op un zaoterdagavond deur ut darp um N.S.B.ers en moffenmeiden op te pakken en kaol te knippen. De pliesie mos uuteraord optreëen tegen dat geweld van die mannen alhoewel ze, docht ik, dat liever niet wilden doen umdat ze ut prachtig vunden en ze misschien ok liever mee han willen helpen. Mar ze hen die mannen op'epakt en in ut pliesieburo op'esleuten. Ut pliesiebro was toen in ut vakantiehuis van Cor Wilders, Op de pol en dat stung op de kruusing van de Achterstraot , de Karkstraot en de Meulenweg. An de achterkant van ut gebouw was un grote glaozen

serre en daor werden ze in 'estopt. 's Zondagssmargens zatten ze dur nog en ze han de grootste lol, de mooiste liedjes werden dur 'ezungen, ok toen ut karkvolk uut de kark kwam bleven ze liedjes zingen en dat waren echt geen psalmveersjes. Toen die mofpenmeiden laoter mit dur kaole kop bie de Canadezen kwammen hen ze daor alles verteld en die Canadezen waren harstikke kwaod dat hun meidjes mit un kaole kop liepen.

Toen wulie weer in ut kamp kwammen mossen we lopen dat ut un lieve lust was umdat die Canadezen toen onze koppen kaol wilden knippen. Ze hen dur één te pakken 'ekregen en die kon mit un kaolgeknipte kop naor huus. Laoter was ut gelukkig weer goed mit de Canadezen en kossen wulie ok weer in ut soldaotenkamp kommen.

+++